



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Acta Synodalia Osnabrvngensis Ecclesiae, Ab Anno Christi
MDCXXVIII.**

Brogberen, Johannes

Coloniae Agrippinae, 1657

Mandatvm D. Ioannis Episcopi Ad Officialem Curiae suae Episcopalis, De
promulgando Concilio Tridentino.

urn:nbn:de:hbz:466:1-14298

M A N D A T V M
D. IOANNIS EPISCOPI
A D O F F I C I A L E M
Curiae suae Episcopalis,

De promulgando CONCILIO TRIDENTINO.



IOANNES, Dei & Apostolicae Sedis gratia Episcopus Osnabrugensis, Monasteriensis, & Paderbornensis, Comes de Hoya. Honorabilis & sincere Nobis dilecte. Cum non sine maximo animi Nostri mœrore intellexerimus, jam dudum varias, erroneas, & orthodoxae Nostrae religioni contrarias, etiam in punctis fidei, passim à Pastoribus, praecipue per hanc Nostram Diocesim Osnabrugensem, doceri opiniones, easque in rudi & simplici populo perniciosissime disseminari; causam vero hujus mali inde vel maxime profluxisse adverterimus, quod rudibus & indoctis plerumque Pastoribus, certa & aperta ad salutem scitu necessariorum Christianae veritatis articulorum, breviter comprehensa, ac typis divulgata methodus, (secundum quam pede inoffenso, & se & suos simplices subditos dirigant,) ubique fere defuerit; & hoc quidem per incuriam eorum, qui, licet in specula vigilantiae Episcopalis constituti fuerant, hisce tamen malis hactenus, imo in hoc usque tempus, inexcusabili torpore indormierunt:

Nos itaque, pro officio Nostro Pastoralis, damnatis illis dogmatibus tandem aliquando per Dei gratiam finem imponere satagentes, nec non incorrigibiles hujusmodi Pastores (cum nulla, pro dolor, in iis amplius sanæ reductionis spes superfit,) privari omnino volentes; sacrosanctam generalem & œcumenicam, non ita pridem feliciter, opitulante Domino, conclusam, Tridentinam Synodum, nec non ab eadem Synodo praescriptum Catholicum & orthodoxum Catechismum, utpote in quo invariata Christiana Romana Catholica religio, ordinate, fundamentaliter & integre tradita continetur, quemque propterea prima die imprimi curabimus, observari per dictam nostram Osnabrugensem Diocesim volumus.

Ne autem Pastores, tanquam hujus Nostrae decretæ resolutionis ignari, ullam habeant prætereundam excusationem; hisce clementissi-

me tibi committimus & mandamus, ut hanc Nostrae mentis intentionem in hac proxime instanti vernali & consueta Synodo, in praesentia Archidiaconorum, cum praelectione hujus Nostri adjuncti Decreti Synodalis de recipiendo & servando in posterum per Diocesim Nostram Osnabrugensem Concilio Tridentino, ejusque Catechismo, debite infinuari, publicari & intimari facias; iisque proinde, nomine Nostro, sedulo & severe injungas, ut sese (sicut in Decreto transmissio latius continetur) per totam Diocesim Nostram Osnabrugensem, tam in caeremonialibus quam doctrinalibus, sub comminatione gravissimæ multæ, immo & actuali privatione suorum Pastoratum & curæ commissæ, sæpe dictis Tridentina Synodo & Catechismo conformiter per omnia gerant: prout etiam unusquisque; praecipue Pastorum & Curatorum, quamprimum dictus Catechismus editus haberi poterit, sibi duos similes, unum nempe cathenæ in publico Ecclesiae pulpito, pro cuiusvis cupientis usu firmandum, alterum pro ordinario suo manuali, sedulo utendum, intra spacium unius mensis, comparare tenebitur. Quod Nostrum propositum, quo facilius & maturius effectui demus, & per hoc quoscunque inutiles & inqualificatos Pastores penitus exterminemus, aliam adhuc reformationem confici, tibi que extradi clementissime curabimus.

Insuper volumus, ut, si quosdam contra expressum tenorem, nuper à te autoritate Nostra publicati & typis emanati Synodalis Mandati, ad hanc instantem consuetam Synodum non comparere, atque contumaciter abesse contingeret, eos, tanquam contumaces, in penam comminatam sexaginta aureorum florenorum Rhenensium incidisse declares, eamque in continenti absque omni conniventia vel personarum respectu exigi procures, secundum hanc Nostram invariabilem clementissimam voluntatem; prout te, & omnes Nostros subditos, hisce Mandatis Nostri morem gesturos, clementissime confidimus. Ex Residentia Nostra Episcopali Iburgensi, xviii Martii, Anno MDLXXI.

IOANNES EPISCOPVS.

Sequi-